

Nagbutang si Jacob ug Batong Haligi

Pangunang mga Bersikulo: “Sayo sa sunod nga buntag gikuha ni Jacob ang bato nga iyang gibutang ilalom sa iyang ulo ug gipatindog kini ingong usa ka haligi ug gibuboan ug lana ang ibabaw niini, ug iyang gitawag kadtong dapita nga Bethel.”
Genesis 28:18, 19.

Pinili nga Kasulatan:
Genesis 28:10-22

Ang yawe nga mga bersikulo karon nagpakita sa usa ka positibo nga sangputanan sa usa ka makalilisang nga kahimtang. Si Jacob mikalagiw gikan sa presensiya sa iyang igsoon nga si Esau. Gisultihan kita nga sa dihang nahibal-an ni Esau nga gikuha sa iyang igsoon ang panalangin ni Isaac, nahimo ang iyang katuyoan ingon nga mamumuno. Gisulti niya og kusog ang sulod sa iyang hunahuna sa pagpanimalos. Ang pipila sa panimalay ni Isaac nakadungog niini ug mitaho niini. Si Rebecca, nga nahibalo na karon sa kahimtang, nagtambag kang

38

Ang Banagbanag

Jacob sa pag-adto sa iyang igsoong lalaki nga si Laban sa PadanAram ug didto, tingali, mangitag asawa.

Gituyo ni Rebecca nga ang kabubut-on sa Ginoo matuman alang ni Jacob. Sa pagkahibalo sa tuyo ni Isaac sa paghatag sa iyang panalangin kang Esau, iyang gisugdan ang sunod nga panag-istoryahanay uban ni Jacob: "Karon, anak ko, paminawa ako. Buhata ang akong isulti kanimo. Lakaw ngadto sa mga panon, ug dad-i ako ug duha ka maayong mga nati nga kanding, ug gamiton ko kini sa pag-andam sa lamiang pagkaon sa imong amahan. Genesis 27:8-10

Si Jacob mitubag sa iyang inahan, "Ang akong igsoon nga si Esau balhiboon, ug hamis ang akong panit. Unsa kaha kon hikapon ko sa akong amahan? Makaplagaan niya nga gilimbongan ko siya, ug unya tunglohon niya ako imbes nga ako panalanginan." Apan mitubag ang iyang inahan, "Kon mao kana, anak ko, himoa nga ang tunglo mahulog kanako, ug buhata ang akong isugo kanimo. Lakaw ug kuhaa ang mga kanding alang kanako!" bersikulo 11-13

Ang walay pulos nga mga pulong sagad mamunga ug daotang bunga. Giingnan ni Rebeca si Jacob, "Anak ko, ipadangat unta kanako ang tunglo nga

alang kanimo,” ug mao gayud kini ang nahitabo. Dili na niya makita si Jacob pag-usab.

Sa iyang pag-ikyas gikan sa Beer-seba, si Jacob niabut sa usa ka dapit ug, sa nagsingabut ang kagabhion, mipahulay sa pagkatulog, ug sa damgo. “Niabot siya sa usa ka dapit ug nipabilin didto sa tibuk gabii, tungod kay nisalop na ang adlaw. Ug nikuha siya ug usa sa mga bato niadtong dapita ug gibutang niya kini sa iyang ulohan, ug nihigda siya niadtong dapita aron matulog. Unya nagdamgo siya, ug ania karon, usa ka hagdanan gipatindog sa yuta, ug ang tumoy niini niabut sa langit; ug didto ang mga anghel sa Dios nagasaka ug nagakanaog niini.” Genesis 28:11,12

Sa iyang damgo, ang Dios nagbarog ibabaw sa hagdanan ug miingon: “Ako mao ang Ginoo nga Dios ni Abraham nga imong amahan ug ang Dios ni Isaac; ang yuta nga imong gihigdaan ihatag ko kanimo ug sa imong mga kaliwatan.. Ug ang imong mga kaliwatan mahisama sa abug sa yuta; mokaylap ka sa kasadpan ug sa silangan, sa amihanan ug sa habagatan; ug diha kanimo ug sa imong kaliwat pagapanalanginan ang tanang mga banay sa yuta. Tan-awa, ako magauban kanimo ug magabantay kanimo.” bersikulo 13-15

Sa pag-ila nga gipamatud-an sa Dios ang dakong saad ni Abraham ngadto kaniya, gikuha ni Jacob ang bato nga gigamit alang sa unlan ug gibutang kini ingong altar. Gidihogan niya kinig lana ug gihinganlan ang dapit nga Betel, nga nagkahulogang “Balay sa Diyos

.” Kita ba ingong mga Kristohanon adunay dinihogang bato diin ang tanan natong paglaom ug mga damgo natukod? Sa pagkatinuod, naa gayud kita. Kini mao si Jesus ang Dinihogan, ang Bato sa atong pagtuo.